

INUIT ATAQATIGIIT

INATSISARTUNI



UPA16/116.3
2.juni 2016
Peter Olsen

Uunga siunnersuut: Kulturikkut ingerlatsineq sunngiffimmilu sammisassaqtitsineq pillugit Inatsisartut inatsisaat nr. xx, xx. xx 2016-imeersoq.

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Pingajussarneerpeqarnerani oqaaseqaatissaq:

Naluneqanngitsut siorna upernaakkut ataatsimiinnitsinni inatsisartut aliangigassaattut siunnersuuteqarnikuuvunga upernaq manna 2016-mi Naalakkersuisut kulturimut aammalu immikkut timersornermut inatsisissamik saqqummiusseqqullugit peqquneqarnissaannik.

Tassa massakkut aana kulturimut inatsisissatut siunnersuut naalakkersuisuniit saqqummiunneqarsimalerpoq, inaarutaasumillu akuersissutigalugu taassissutigisussanngorparput.

Taamaattumik piffissaq manna iluatsillugu inatsisartunut, naalakkersuisunullu tamanut qujanarujussuaq tapersersuisimanissinnut, minnerunngitsumik ilinniartitaanermut ilisimatusarnermullu ataatsimiisitaliamut suleqatigiilluarsimanitsinnut paaseqatigiilluarsimanitsinnullu qujanarujussuaq.

Nuannaarutigilluinnarpara tulluusimaarutigilluinnarlugulu, partii suminganeerpeq apeqqutaatippallaarnagu inatsisissalli pilersinneqartussap inuiaqatigiinnut tamanut siunissami sunniutissai pitsaasut pingaarnerutillugit isiginiarnerullugillu partiit assigiinngitsut taamatut suleqatigiilluta pilersitseqatigiissinnaagatta.

Torrek taali qujanarujussuaq.

Taamanikkut siunnersuutiga saqqummiuteqqaarakku, eqqaamavara naalakkersuisorlu oqqateqqaalaarnikuusimalluta kulturimut inatsit, imaluunniit eqqumiitsuliornermut inatsit sorleq taakku arlaat pilersinneqassanersoq imaluunniit pilersinneqassannginnersoq, sorleq pingaarnerua sorleq pingaannginnerua il.il.

Eqqaamaneqassajunnarsivoq sorleq siullua, sorlerlu pingaarneruamik eqqartuininninni assersuuteqarnikuugama, ilaatigut nuannersumik tiguneqarnikuusoq eqqaamalluarakku, assersuusianguara eqqaaqqilaarusukkiga, imaattoq; Kukukooq mannialuunniit? Kukukooq mannialuunniit sorleq siullua? Kiamita tamanna akissutissaqartippaa?

Ullumikkut aperissaanga; Nipisa, sualuunniit sorleq siullua?

Ajunngilaq taamani pisimavoq oqallinnerpullu taami nuanneraluaannarpoq. Pingaarnerpaaq unaalerpoq, tassa isumaqatigiissutigaarput; kulturimut eqqumiitsuliornermut timersornermullu immikkut taakku tamarmik inatsisiliunneqassasut.

Ilumoorpoq kultur sorpassuarnik imaqarpoq imartoorujussuullunilu: Siulitsinnit kingornussimasatsinnut tunngassuteqarsinnaavoq soorlu; kinaassutsitsinnut oqaatsitsinnullu, qajartortarnermut, qilaatersortarnermut, qimussertarnermut, atisaliortarnermut kalaallisuliortarnermut, nerisaqarnermut allarpassuarnullu tunngassuteqarsinnaalluni.

Nunatsinni qanga, nunatsinnilu ullumikkut nutaaliaasumi avataaniit inuiannit allanit sunnerneqarsimasumi, kulturivut ilaatigut immikkoorlutik, ilaatigullu ataatsimut akuleriisinneqarsimallutik sulii ineriartorput ineriartortuarput pikialaartuarpullu; Taamaattumik...

Nuannaariinnarlugu inatsisiliortoqarnissaanik kissaateqarnikuunngilanga; Neriuteqarlunga kulturimut inatsisiliortoqarnissaa siunnersuutigivara; taamaattumik neriuppunga inatsisissap uuma 2017-mi atuutilersinneratigut, inuiattut immitsinnut nassaariniarnitsinni, kinaassutsitta ujjartorerani, inuiattullu anersaakkut timikkullu nukittunerulernissarput pillugu anguniagaqarnitsinni, aqutissavut periarfissagullu pitsaanerungaalerumaartut.

Asanninneq, neriunneq, kiffaanngissuseq, ataqpeqatigiinneq, qanilaarnerlu qanortoq siammarlik inerinneqarlillu nunami maani inuinullu tamanut.

Tamassinnut qujanarujussuaq.

Peter Olsen